



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

Tir Yimyim

tiryimyim@aolima

tir yimyim

TAPAK 8

AIMC president Sushmita Devi party toktsüogo ta osang prokshi

Pakistan PM Imran Khan-i Nung trust vote akok



VOL. XVIII NO. 142 (ADOK 142) DIMAPUR

AMUNGNÜ (SUNDAY)

METSÜREMI (MARCH) 07, 2021

₹ 5.00

Minister Kronu-i job reservation policy inyaka aruba lemsatep

Kohima, March 6 (TYO): Planning & Coordination, Land Revenue Minister, Neiba Kronu-i Hokolbarnü Nagaland nung backward kintem asoshi job reservation policy inyaka aruba osang metetdaksü.

March 5, 2021 nü state sorkari ayongba reservation policy atema senden tenzüka jembidang Minister Kronu-i ashiba agi "tesüiba mapang luden aikati sorkar mapa nung shilem lemsatka yutsütsü indang tebilemstü atema inyakogo."

"Banuo Jamir Committee, Kevichusa Committee, Temjen Toy Committee amala luden balalai iba tebilemstü onük atema inyakogo. Lisopur Naga nung atema reservation ji 1967 kum tenzüker aser tangar memenebpa kintem atema reservation ya 1977 nungi beshia arur" ta pai ashi.

"Tesüiba kum 44 tsüingda Nagaland nung reservation policy inyaka arudang temelenshi aika süogo. Policy ka danga tabensa mali aser mapang melenshi aoba ama melenshüsü nungdaker. Iba jagi sorkari tang tamshidak reservation policy meyipa repringshimsü telemteba agi" ta Minister Kronu-isa metetdaksü.

August 2019 nung Review Committee on Job Reservation policy ka tentet. Iba luden nung mendenbuba Sentiyanger Imchen, ACS & Development Commissioner aser züngsem asütsü atema Home Commissioner, Administrative Head of P&AR, Administrative Head of DIIDA aser Director, DUDA (Member Secretary) nungertem shim.

March 2, 2020 nü Cabinet-i reservation policy meyipa repringshimsü atema iba Committee nung nübotem shimshitsü lemetet. Iba luden nung J. Alam, ACS & Development Commissioner mendenbuba aser P&AR Department, Home Department, DUDA aser Justice & Law Department züngsemtem asütsü shim. Ajisüaka, Committee-i Cabinet Sub-Committee nem ano osang magütsü lir, ta paisa ashi.

State sorkari NSSB tentetstü telemteba agi kechiyong iba osang

ya July 20, 2020 nü sangoktsür liasü. Ajisüaka, iba atema ashishitep onük aika benokba agi cabinet-i NSSB sota yua lir, ta Minister Kronu-isa ashi.

ENFS-i NSSB regulations, 2020 aser NPSC ajanga reservation policy inyakba nung onük aika ashishitepba nung ajemdaker Cabinet Sub-Committee ya tentet, ta paisa shisem.

December 14, 2020 nü Core Committee on Rationalization of Reservation Policy (CCoRoRP)-i Nagaland Reservation Policy indang Chief Minister nem tezüluba agütsüba aser ano Tenymia Students Organizations-i agütsüba shiditem atema December 18, 2020 nü Cabinet senden amen.

CCoRoRP nung kin pungu kaketshir teloktem dena lir. Parnokji All Sumi Students' Union (SKK), Angami Students' Union (ASU), Ao Students' Union (AKM), Lotha Students' Union (LSU) aser Rengma Students' Union (RSU) lir, ta Kronu-isa metetdaksü.

Reservation Policy aser NSSB inyaka aoba dak sendakba nung tebilemstü onük aika lir ta ajiteta Cabinet Sub-committee-i Nagaland state indang Reservation Policy atema tebilembatem meshiogo, ta paisa ashi.

Nagaland nung Backward Tribes (BT) atema reservation ya 1977 nungi tenzüker. Iba mapang Nagaland state-i Backward Tribes ta asüba kin 7 atema non-technical aser non-gazetted mapatem nung 25% reservation agütsü. Item kin 7 ya shisaliok aser rongsenkettsüing tsütsü tangar memenebpa ta ajiteta aser ano kum 10 tashi sorkar mapatem nung nübo peria meshimokba atema reservation lemsatksü, ta paisa metetdaksü.

"Iba sülen kin talila bendenlokogo aser reservation menden timba akum. Tang 37% reservation nungi 25% ji Eastern Naga BT tribe 6 (trok) aser 12% ji tanga BT kin 4 (pezü) asoshi lemsatksü lir. 2001 nungi BT tsüingda kasa reservation lemsatksü atema roster system tenzüka inyaker" ta Minister Neiba Kronu-isa ashi.

COVID-19 Nagaland: Nisung 1 dak putet; 1 taneptsü angu

Kohima, March 6 (TYO): Honibarnü Nagaland nung nisung ka dak COVID-19 aliba putet aser ano nisung ka taneptsü angu.

"Tanü Kohima nung nisung ka dak COVI-19 putet aser nisung ka taneptsü nguogo" ta Health & Family Welfare Department Director, Dr Denis Hangsing-i ashi.

Nisung 12,211 rongnungi 11,952 taneptsü nguogo. Nagaland nung COVID-19 nungi taneptsü angubaji 97.88% lir, ta paisa ashi.

Tang nisung 15 anepaludar aser COVID-19 puteta alir nisung 91 süogo. Ajisüaka,

tasürtem rongnung parnok 10 bo tanga timtem ajanga asü. Külén, nisung 153 tashi tanga state temi ogo, ta Dr Hangsing-isa shisem.

Tang anepalurtemji Dimapur nung nisung 1 aser Kohima nung 14 lir. Ajisüaka, parnok shinga dak-a shirangba yimya mali, ta paisa ashi.

"Nagaland nung COVID-19 alitsü akok ta temolung melemba bilemba sample 1,31,612 tendangogo. RT-PCR ajanga sample 74,978, TrueNat ajanga sample 37,375 aser Rapid Antigen Test ajanga sample 19,259 tendang" ta Dr Hangsing-isa ashi.

DALT-i Consumer Awareness shisatokden ayonga agi



Dimapur Ao Lanur Telongjem (DALT)-i Honibarnü Consumer Awareness indang shisatokden sentong ayonga agidang tangokba noksa ka angur. (Dimapur, March 6)

Dimapur, March 6 (TYO): Dimapur Ao Lanur Telongjem (DALT)-i Honibarnü Consumer Awareness indang shisatokden sentong ka ayonga agiogo.

Iba sentong ya DABA Main Church Dimapur nung agi aser Department of Legal Meteorology, Government of Nagaland-i nungita yari.

Nisung ajak consumer kaka asünung services shitak angutsüla aser ano ochimashi shishilembartem anema ken o tem benoka ozüing tapet agi merenshitsü tesayubatem agütsütsü atema DALT-i iba sentong ayongzüka agiogo.

Sentong nung onirji DAYO Advisor Imtiakum liasü aser shisalen sayurtemji Advocate Rongseninla aser Advocate Imti Imsong na liasü.

Shisalen sayur advocate Rongseninla-i o jembidang rongsenkettsüing nung telok tulutibaji consumers lir ta ashi.

"Ajisüaka, telok tulutiba jungjunga amenteta mali aser aiben parnok indang tebilemba aser olatem mangashir. Shitakba agibo tesem ajungalen consumers-i pei

temeten atema noktaksü asoshi jungjunga amenteta alitsüla. India nung consumer protection ya tasen masü saka alemli nungi beshia aruba inyakyim ka lir" ta Rongseninla-isa ashi.

"Consumer kati shishilembar ka nem maongka agütsür aser shishilembatsü indang alizüingji consumer lir," ta laisa Mahatma Gandhi-i jembiba olen ka telok den lemsatepa liasü.

Consumer timba kati consumer courts aliba memetet aser consumer rights telok ana- asem ka dang lir.

"Consumer rights civil society temi public nem parnok temeten metetdaksütsü atema awareness sentongtem agitsüla. Tayokertemi tim mesüi yokyayokjiba anema consumer temi ola adoktsü atema ajungmesotsüla" ta laisa metetdaksü.

Maneni, shisalen sayur advocate Imti Imsong-ia Consumer Protection Act 2019 indang jemi.

"Consumer Protection Act 2019 nung product liability indang onük aika benoka lir. Nisung kati product yanglur mesüra tayoker ka anema ken o benoktsü temeten

peria dang agüja lir," ta Imti Imsong-i ashi.

"Consumer society temi consumer rights dak sendakba ken o tem atema mapa inyaksü temeten kecha mali. Iba mapaji district, state mesüra national commission kati dang inyaktetstü. Ajisüaka, consumer kati okadak ken o benokba nung consumer society-i yariteptsü akok" ta paisa metetdaksü.

"District commission-i sen crore ka teküpok indang, state commission-i crore 3 nungi 10 tashi aser national commission-i crore 10 ser tema indang ken o tem benoka angadangsü akok" ta Imti Imsong-isa metetdaksü.

"Asen state nung rongsenkettsüing inloka aotsü atema Naga nung aser talisa Aortem dang khen tajangzük angutsü atema benami account mamshidaksütsü mepishir" ta DALT-i sangdong ka nung metetdaksüogo.

Iba shisatokden sentong ya K Takeeth Imchen, Joint Controller Department of Legal Metrology and Consumer Protection teyari ajanga takok ngua agitetogo ta DALT-isa ashi.

NSCN (IM)-i nisung tepsetba anentsüla: PRO (Def)

Dimapur, March 6 (TYO): February 21 nü Longding District kübok Chatung yimtsüing anasa NSCN (K2) züngsem Jomie Konyak tepsetba nung NSCN (IM) shilem kecha mali ta osang metetdaksübaji tiyazü aser kuli kecha mali, ta PRO (Def) Kohima sangdong ka nung metetdaksüogo.

"February 28, 2021 nikongdang 2:30 ako meta Chatung nung tambur kati Pvt Jonie Konyak indang tasügang angu. Pa ya Mon District nungi liasü aser pa tenük nembangtsüba den süngdong ka nung süngzü agi aleneter liasü. Pa injang agi mekhasetdang reshikangshiba zübotem keta liasü ta Arunachal Police-i shiogo" ta Lt Col Sumit K Sharma-i sangdong nung ashi.

Kasa anogo nikongdang 3:20 ako meta Sgt Wanglem Wangsu-i ashiba agi Jonie Konyak tena Tisa ayong anasa jen ka nung anistungzüka alidang NSCN(IM) züngsem kar angu aser tenati jena aodang NSCN (IM) züngsemtemi Jonie apu. Wangsu ya 2019 kum NSCN (IM) toktsür NSCN (K2) nung aden.

NSCN (IM) züngsemtemi Pvt Jonie Konyak kanga mejungi reshikangshiba sülen tepset ta kulitem bushitetogo. Iba mapa nung NSCN(IM) Sgt Maj Wangnai-i shilem agir alitsü akok ta iba tesem nung alirtemi shiogo, ta PRO (Def) Kohima-isa metetdaksü.

NSCN (IM)-i June 2018 nung Tirap MLA Tirong Aboh aser

nisung 10 tepset, October 21, 2020 nü Sanliam, South Arunachal Pradesh nung Assam Rifles column ka amak, India & Naga wako amer yimjung meimba lanur ka züka merenshi aser Manipur nung senotsü tim mesüi amshiba anema social activist kati RTI application benokba atema pur oa reshikangshi saka parnoki item mapa kecha meinyak ta shiyonga arur, ta sangdong nungsa shia lir.

NSCN (IM) ketdangpurtemi item tatalokba atema tenüing agitsüla aser Assam Rifles dak tenük yoker mapa meinyaksüla. Assam Rifles ya North East anükertem lir aser onok iba tesem aser nübertemi aginüba ama maneni inyaksü, ta Lt Col Sumit K Sharma-isa ashi.

Lidi Kro-u teloki training sentong ka ayongzüka katsü



Ziekezou Kohima nung March 6 nü Kohima village nung Lidi Kro-u teloki ayongzüka training sentong nung tesayur aser tangazükertem tangokba noksa nung angur. Iba training ya sobaliba tasatem angazükdaktsü atema ayongzüka agi.

Kohima, Metsüremi/March 6 (TYO): Benjung aser inyakyim dak alia Angami kin Sekrenyi benjung amungba nung shilem ka ama Kohima village kübok kiyong balala nungi adenshiba tetsür telok; Lidi Kro-u-i, aiür aser asangur chanutem nem sobaliba tasa balala angazükdaktsü atema Honibarnü DBHSS Kohima anasa Ziekezou nung training

sentong ka ayongzüka katsüogo.

Lanurtemi sobaliba inyakyim balala angazüka maliba atema tebilemsü kaa bilemba den sobaliba osettsüt aser mapatem samaa aoba süoki-ia bilema Kohima yimtsüng nung aliba Angami nungertem indang sobaliba tasa aser shisatsütem wazüka ayutsü nükjidong nung item tetsürtem ya adenshi.

Training agütsüba nung shilem ka ama Lidi Kro-u teloki aiür aser asangur chanutem nem Woven Traditional Headgear ataktsü, tsük asentsü aser merektsü tangazükba agüja liasü.

Lidi Kro-u teloki ashiba agi, parnoki maneni sobaliba tasatem, tarnunger otsü, ken aser inyakyim balala lanur tejangrartem nem tangazükba agütsütsü.

Tuensang DP&DB senden menogo

Dimapur, Metsüremi/March 6 (TYO): March 6 nü DC Conference Hall Tuensang nung Tuensang District Planning and Development Board senden menogo. Iba senden ya IAS DC & Vice Chairman DP&DB Tuensang Kumar Ramnikant lenisüba nung agi.

Senden nung Shamator ADC HQ nung Sub-Jail ka aser Fire and Emergency station ka amenoktsü atem aser Temjen Memorial School Kuthur class VIII tashi ajungkettsü asoshi sensak asem aser iba onük ana ya agizükdaktsü atema iba dak sendaka aliba department dangi abentsü lemtet.

Senden nung taruba 51 A/C bi election indang sensak asem aser mendenbubai HOD tem dang takokba tashi teyari agütsütsü asüngdangba den election nung amshitsü atema pei department indang gari aser employee indang list benoktsü metetdaktsü.

DC-isa, COVID vaccine agütsüba tasembuba shilem indang metetdaktsü aser CMO Tuensang Dr. Moa-i, vaccine agütsüba inyakyim aser vaccine indang züngsemtem nem metetdaktsü.

Teyari bushia badminton stadium yanglushitsü asoshi sentong yanglur aliba taruba

hopta nungi tenzüksü ta District Fishery Officer, Tuensang Rongsen kumzuk-i metetdaktsü.

Maneni züngsemtemi jana bendenba tesem nung treatment plan ka amenoktsü atema benoktsü telemtetba agi aser ano DC and Vice Chairman DP&DB-i, ayonglanglen tzü jenjang asadanga alitsü atema PHED Department nem nongloktsü.

District HQ tem nung public parks amenoktsü atema Planning and Coordination department-i tetuyuba agütsür aliba onük dena benoka sensak asem aser park yanglutsü atema tesem ana shimdanga liasü.

Kohima nung "Keep Our City Clean" sentong maneni agidar



March 6 nü Kohima nung "Keep Our City Clean" omen nung ajemdaker merekmejuba sentong nung shilem agir kar noksa nung angur.

Kohima, Metsüremi/March 6 (TYO): "Keep Our City Clean," omen nung ajemdaker merekmejuba sentong maneni ayongzüka agia, tanü Kitsubozou nungi Seikhazou tashi merekmejuba sentong nung nüburtem aikati shilem agiogo.

Iba merekmeju sentong nung Chakhesang Baptist Church Kohima youth department, CRC Chakhesang, Kitsubozou, Panchayat aser Kitsubozou youth organization-i shilem agia liasü.

Iba sentong nung Nagaland Contractors & Suppliers Union (NCSU) tir Pele Khezhe-ia shilem agi aser pai ajak dang Kohima yimti mereka ayutsü atema pei sasep nung merekmejuba yimya tajung süpatsü ayongzü.

Kasa mapang nung Khriehuzo Lohe-i, sentong nung shilem agir ajak dang kanga pelaba lemsatet. Taruba merekmejuba sentong March 13 nü D'Block nung agitsü.

Temetetsükaji 'Keep Our City Clean' omen dak

ajemdaker merekmejuba sentong ya wadang balala nungi yimti atema süoki ia bilemba nüburtemi Kohima yimti mereka toktsütsü atema tangazükba agütsütsü nükjidong nung tenzü.

Iba sentong ya village welfare organizations, kaketshir lokti tentet, Arogo, kiyong balala lanurtem, NGO tem aser lokti nung stakeholders tem den longjemer nüburtem mulung nung merekmejua alitsü atema tangatetba ka agütsütsü nükjidong nung tenzü.

Peren District CAB senden menogo

Dimapur, Metsüremi/March 6 (TYO): March 5 nü DC Conference Hall, District Hq. Peren nung DC Peren, Sentiwapang Aier lenisüba kübok Peren District CHILDLINE Advisory Board (CAB) senden menogo. DC ya Peren District CHILDLINE Advisory Board (CAB) mendenbuba lir.

Senden nung board züngsemtemi district nung CHILDLINE inyakyim indang sensak sema liasü. CHILDLINE Peren rescue vehicle dak sendakba nung Peren District, Centre Coordinator Ibamsile-i, tekümsükba maparen balala inyakba mapang gari maliba amala tetsükdaktsü balala ajuruba indang lemsatet. Iba dak sendakba nung ken o reprangshimtsü atema DC-i

tenangzüka agüja liasü.

Tanga onüktem rongnung, Peren District Official website nung CHILDLINE weblink aser Komal film on Child Sexual Abuse inoksemtsü, anogoshia check-post tem adena aitba aser tuguba garitem mangoka ayutsü, Child Labour dak sendakba nung DTF senden ayongtsü aser lokti tentet balala den longjemer Child Rights aser Child Protection indang training cum orientation sentong ayongzüka agitsü densema liasü.

Maneni Centre Coordinator, Ibamsile-i powerpoint presentation tatsü ka agütsü, kong lai CHILDLINE indang nükjidong aser jenjang agibatem, intervention model, tanur kümzüka inyakyimtem aser takoktem aser tanü tashi CHILDLINE inyakyimtem indang metetdaktsü.

AR-i hadir sayaba sentong ayongzüka katsü



Dimapur, Metsüremi/March 6 (TYO): HQ IGAR (North) kübok 5 Assam Rifles Battalion-i ayongzüka March 5 nü Tetso College, Dimapur nung Kohima Group NCC Cadets tem atema hadir sayaba (Weapon Display) sentong ka ayongzüka katsüogo.

24 Nagaland (I) Coy NCC, Kohima Commanding Officer Col Daniel Lotzem aser Kohima NCC Group nung 24 Nagaland (I) Coy Senior Division aser 1 Naga Girls Bn senior wings nungi NCC cadet 110-i iba sentong nung jangrabangra shilem agiogo.

Cadets tem nem Assam Rifles Battalion nungi tetayur 5-i Indian Army-i

amshiba hadirtem indang tangazükba agütsü. Armed Forces ya career ama agitsü atema cadets tem ajungmesotsü asoshi iba sentong ayongzüka agia liasü.

Brig K Venugopal SM, Group Commander Kohima NCC Group tenüng nung, Commander Officer, 24 Nagaland (I) Coy NCC Kohima Col Daniel Lotzem -i, SM, Commanding Officer Col Md Raza Israil aser 5 Assam Rifles Dimapur Battalion dang, NCC Cadets shirnok asen linük tarutsü nükdang lir, parnok atema hadir sayaba sentong tajung ayongzüka katsüba atema kanga pelaba lemsatetepa liasü.

AR-i medical camp ayongzüka katsü

Dimapur, Metsüremi/March 6 (TYO): HQ IGAR (North) tawabangba kübok Assam Rifles Tuensang Battalion-i March 5 nü Mon district kübok Tangkong aser Yangkhao yimtsüng nung Medical camp ayongzüka katsüogo.

Iba Medical camp ya yimdaklirtem talisa, tantsür tambur, matamabensartem aser

tetsürtem nem teyari agütsütsü nükjidong nung ayongzüka, shirnok temang anepalutsü atema tesem talangi moteter. Mapa shidak nung vaccine agiba aser merekmejua alitsüba dak sendakba nunga parnoki tangazükba balala agüja liasü.

Camp nung tebur 92, tetsür 94 aser tanur 28 temang tendangogo.



Tripura kübok Sepahijala district nung The Indigenous Progressive Regional Alliance (TIPRA)-i lokti sentong tulu ka ayongzüka agidang tangokba noksa angur. Iba sentong ya TIPRA lennir Pradyot Kishore Debbarmar-i ketdangsüa ayongzük aser Indigenous Nationalist Party of Tripura (INPT) nungi Bijoy Hrangkhal, Chitta Ranjan Debbarma aser Budhu Debbarma nungertema aden

AIMC president Sushmita Dev-i party toktsüogo ta osang prokshi

Guwahati, March 6 (Agencies): Assam Assembly election atema Congress-i candidate tem ano memetdaksüi alidang All India Mahila Congress president Sushmita Dev-i party nungi anenba shidi agütsüogo ta tanü media osang kar ajanga metetdaksüi.

Candidate tem shimba aser AIUDF den menden lemsaba nung temolung masüba agi Dev-i party nungi anen ta parnoki ashi, saka Assam Pradesh Congress Committee (APCC)-ibo lai party metoktsü ta jangjashitsüogo.

Hokolbarnü Sushmita Dev-i New Delhi nung oa Congress president Sonia Gandhi dang Assembly election atema

candidate shimba atema mepelaba osang lemsatop.

Taoba party MLA Rumi Nath Barkhala constituency nungi tokteptsü shimba atema taoba Silchar MP Dev mepelar.

Dev-i iba constituency nung Nath melena Papon Deb shimdaksünüa liasü.

Rumi Nath-i party anema mapa inyakba atema yaküm la Congress party nungi anentsü. Ajisüaka, osang angazükba agi Congress-i Barkhala constituency nungi Nath toktepdaksütsü telemtetba agiogo.

Ano, Dhalai menden nungi Dev-i Hirak Das nem ticket agütsüdaksünüa liasü saka party-i tanga candidate ka nem ang agütsütsü telemtetba

agiogo. Iba osang prokshiba sülen tanü Congress lennir Pradyut Bordoloi-i taoba MP Sushmita Dev party nung anenbaji tiyazü ta metetdaksüi.

"Dev-i party toktsüogo ta media osang ajanga ashibaji tiyazü. La temolung masüba kar alitsü akok saka ozü party itemji angadangtsü" ta Bordoloi-i ashi.

"India Mahila Congress President Sushmita Dev-i Congress toktsüogo ta television aser web portals nung prokshibaji Assam Pradesh Congress Committee-i angazükogo. Sushmita Dev-i party metoktsü" ta Congress spokesperson Bobbeeta Sharma-ia metetdaksüi.

IPFT-i maneni BJP den tesentaktep ayutsü

Agartala, March 6 (Agencies): Tripura chuba jabaso Pradyot Kishore Manikya-i Tripura nung lisopur teloktem longjemtsü merangba nung tetsükdaksü ka ajuruogo.

Tripura nung BJP-i aniba sorkar den yariteper Indigenous People's Front of Tripura (IPFT)-i state aser nübertem taginüba ama maneni BJP den tesentaktep ayutsü telemtetba agishiogo.

Tawa tu Manikya-i IPFT dang Tipra Motha den longjemer Tripura Tribal Areas Autonomous District Council (TTAADC) election

nung tokteptsü mesüzüka liasü. Ajisüaka, BJP-i anogo ishika tsungda nung IPFT parnok den adentsü mesüzükogo.

Deputy chief minister Jishnu Dev Varma-i Tripura chuba'er kibong den tesentaktep tajung lir aser pai tanü IPFT lennirtem Mevar Kumar Jamatia aser Mangal Debbarma na den senden ka amen.

Iba senden nung April 4 nü agütsü aliba tribal council election atema jembitep.

Iba mapang BJP aser IPFT lennirtemi külemi longjemer iba election nung tokteptsü molungtep. IPFT lennirtemi

council menden 28 nungi 12 nung tokteptsü akhanger.

"Deputy Chief Minister-i IPFT den jembiteptsü mapa lemezükja lir aser parnoki 16:12 formula molunga agizükogo. BJP rally sülen March 9 nü iba dak sendakba osang sangoktsütsü" ta tanü BJP tongti lennir kati ashi.

"March 9 nü BJP sentong nung IPFT lennir NC Debbarma aser Mevar Kumar Jamatia na aden nunga tesüngmang. Iba ya lisopurtem atema Greater Tipraland pungmangba maharaja nem telangzüba tajung ka agütsüba asütsü" ta paisa ashi.



Assam BJP president Ranjeet Kumar Dass den Paramananda Rajbongshi (achiji) aser Rupesh Gowala (abelen) noksa nung angur. Taoba Asom Sahitya Sabha president Dr Paramananda Rajbongshi-i Bharatiya Janata Party (BJP) nung denogo aser Sipajhar Assembly constituency nungi pa party candidate asütsü shimogo.

SDF indang 29 buba Foundation Day among

Gangtok, March 6 (Agencies): Sikkim Democratic Front (SDF)-i Gangtok nung aliba party headquarters nbung 29 buba Foundation Day mongogo.

Iba sentong nung taoba Chief Minister Pawan Chamling-i o jembidang 2024 Assembly elections matongdang party tashi itshitsü indang jembu.

"Ni politics toktsünür saka Sikkim aser idaki alirtem meimba ajanga metoktsür" ta pai ashi.

Party züngsem timba kati Bharatiya Janata Party (BJP)

nung dennür aser külen taruba election nung Sikkim Krantikari Morcha (SKM) party den tayongzükba tulu lir.

"Asenoki tesüiba mapang aibelenbatem nungi angazükdi aser tajung inyakbatem ajanga akasodaktsüdi" ta Chamling-i ayongzük.

"Asenok democratic party ka lir aser ajak aniokr. Asenok külem lenisüba ajanga mapa inyaker" ta taoba Sikkim Chief Minister-isa ashi.

SDF-i 1994 nungi Sikkim nung sorkar ketdangsüa aru saka 2019 assembly election nung parnoki tamakok angu.

NIA-i NDFB 3 züngsem 3 anema ken o benok

Guwahati, March 6 (Agencies): 2014 küm Assam nung police amakba ken o ka nung National Investigation Agency (NIA)-i NDFB-S züngsem 3 anema chargesheet benokogo.

Guwahati nung aliba Special NIA Court ka nung NIA-i ken o ji benok. NDFB-S züngsem asemji Bishnu Narzary, Nitul Daimary aser Runiluish Daimary nungertem lir.

The chargesheet was filed before the Special NIA Court in Guwahati on Friday.

Iba lendong nung Sonitpur nung ADSP Gulzar Hussain aser civilian Anlark Basumatary

na tepset aser police aika yiru.

August 2019 nung NIA-i iba ken o bushisüngdangtsü agizük aser NDFB-S züngsemtemi iba mapa inyak ta parnoki kuli bushitetba metetdaksü.

Narzary aser Nitul Daimary na ya tanga ken o ka nunga aitsüogo. Iba ken o nung Narzary tasüba agi merenshitsü aser Nitul taküm piyong tepuokdak ayutsü obendang agüja lir.

Iba ken o nung tai tonglokja alir nisung ana Kham Kham Daimary aser Junu Basumatary nabo taoba mapang sepaitem den khatepdang khasetogo.

Meghalaya cabinet-i mezüngbuba Health Policy agizükogo

Guwahati, March 6 (Agencies): Meghalaya sorkari state indang mezüngbuba Health Policy agizükogo.

Iba policy dang MOTHER (Measurable Outcomes Transforming Health sector through a holistic approach with a focus on women's Empowerment) ta ajar aser Hokolbarnü Cabinet senden nung agizük.

State sorkar indang health policy saka tang iba agizükba ajanga Meghalaya nung health

policy ka alitsü. COVID-19 wara mapang State Health Policy ka yangluba state ji Meghalaya mezüng asütsü.

State Health Policy ya draft National Health Bill, 2009, National Health Policy 2017 (NHP, 2017) aser National Public Health Act, 2018 (draft) den mesüktepa lir.

Iba policy nung Preventive, Curative aser Enabling aspects dena lir aser senso ajak talisa sensakertem nem health care agütsütsü lateta lir.

Piles Anepaluba - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Ajma agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang **Kabiraj H. Umar Chesam contact no. 7627917983 / 7627998690 Address: 1. Burma Camp, Police point, 2) near Nagaland Gate, tetuyuba nung anidaka surgery kecha magii (non-surgical) anepalur anogo ishika tsungda ni taneptsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM Yours sincerely - R.John, Add: 4th Mile**

IN THE COURT OF PRINCIPAL DISTRICT & SESSIONS JUDGE MOKOKCHUNG : NAGALAND NOTICE

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/pension benefits of late Tsükitsungla has been applied by Shri. Limazulu H/o Lt. Tsükitsungla R/o H.No. 662 School Compound, Chuchuyimpang Village Mkg. Nagaland for possession of.

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 24.3.2021

Given under the hand and seal of the court on this the 24.2.2021
Principal District & Sessions Judge
Mokokchung : Nagaland.



TIR YIMYIM YIMOBILEM (EDITORIAL)

DIMAPUR AMUNGNÜ, METSÜREMI (MARCH) 07, 2021

YISU TIMTEMA LANGA LIDI

Nüortem taküm aser tanüla kümzüksü asoshi Tsüngremi Mosa ajanga agütsüba ozüing liasü saka nisungtemi ozüingji pei amshinülen pei temeten aser pei ajung asaa amshi. Iba Mosa ozüing jagi nisungtem mazüoktet, anungji parnok taküm aser tanüla samatsü lia mesamadaktsütsü asoshi Tsüngremi meimchir kanga meimba agi, Pa ajaso chir Yisu Khrista yok ta asenoki Yohan 3:16 nung shia angur. Alima tashitemetet kisüing nung amangertem asoshi, Tsüngrem chir ka nisung kümer alua nisungtem ket nung reshikangshia kangki nung metabaji tamashi aser temenünütsü o asütsü akok saka kümzüka alirtem asoshi ibaji Tsüngrem ain aser tashi lir ta 1 Korint 1:18 nung shia angur. Ibayongji, Yisu asenok asoshi timtema kangki nung asü, arem aser shia aru ta asüba takok osangtajung dakji amang langa asenok Khristan takümtem ya alitsüla ta Filipi 1:27 nung Paul-i Filipi nung aliba tamangertem dangi züluba o ka shia angur. Ibai asenok tamanger ajak asoshi kanga tongtibang o ka lir, kechiyong asenoki Yisu Khrista dak amangba o Yisu asenok asoshi kangki nung timtema asüba aser Pa takok tulu nung shia aruba sentsüwangshi kuli naji meputeptsüsa asenok alir. Paul Tsüngremi ajaba anogo nungi tenzüka pai kodanga pa madang Tsüngrem taochi jungkai adoka pa kümzükba tesüingmangtsü ain aser tashi indangji mamadok. Pai pa kümzükba langa pa taküm alitsüba kanga tongtibang ta angatet, anungji Paul-ibo pa taküm lendong majurui tesünep nung alibaji masü saka Yisu asenok menen asoshi timtema amato timtem lendong tia ajuruba taküm tiajiang, Yisui kümzükba langa alir ta angateta liasü. Iba jagiang paisa, " ni asoshi taküm alibaji Khrista atema aser tasüabajibo ano tajangzük," ta Filipi 1:21 nungsa shia angur. Iba taküm kuliji atamata taküm kuli masü. Iba takümjiang Yisu asenok menen asoshi kangki nung asüba langa aliba taküm lir. Ashiko, asenok aika asoshi Yisu sülen anidakba tangatetbaji " ni Khristan akümbaji kenü danga timtem, lendong aser takoksa majurutsü aser arishi talang yutsütsü," ta asüba tangatetba alitsüa akok. Iba jagi Yisui asenok nisung shia kangki (khuret) bener Pa sülen anidakang ta ashi ser nung, shirang marem asenoki tanga tsüngrem bushir, sensak marem asenoki Yisu toktsür sen sülen anidaker aser tamakok aser takoksa marem asenoki Yisu shia aruba ain aser tashi masü alima ain aser tashi bushir. Iba ama taküm yimya jagi Yisu kangki nung asenok menen asoshi asüba asenoki amajok kümdaktsür. Asenoki asen taküm den medemdanga bilemdangtsüba kaji, Tsüngrem temeim aser taochi ya alima meimchirtem kümzüksü asoshi, putu aika miima yur külen, Paul nunger mapang nungang jungkai adoka agütsü. Ibayongji dang pa ama, Tsüngrem anema inyaker taküm ka kümzük ta Paul-i Kolosi 1:26-27 nung shia angur. Iba kasaji asenokia asen tsürabur putu nung asen limai Yisu Khrista osang tajung aruba ya angatet asüba, yamai külena masü, külena masü ta mainzütsü saka Yisu asen menen asoshi asü langa asenokia timtem aser maksü arema amangtetla. Laishiba nungsa Paul-i asenok nem angatetdaksünubaji asen taküm nung Yisu Khristaji kibur ta agizüka amangbaji, asenok azükarua takar aser tuler küma timtem tak ta majurui jangratema alitsü asoshi dang masü saka Pa asoshi timatemtsü asoshi dena amanger ta Filipi 1:29 nung shia angur. Tsüngrem temeim agi asenok kümzükba osang tajungbo asenoki agizük saka tamanger memesük alitsüba Khristan takümji tezüdangtsüka lir. Koba tia aser jenjang ka nung asenok lidir liaka, asenoki Yisu Khristaji asenok menen asoshi timtema kangki nung asü, arem aser shia aru ta amangra, alima nung timtem tekangshi aser sensak tia aremtsüabajibo yutsür, tasütsüa dena metsübuttsü, kechiyong, Paul-i ashi ama, Yisu timtema asüba langa amangertem asoshi ibaji tasübajiang, ano, asenoki Yisu Khrista dak amangba langa tajangzük angutsüba limai aoba mapang lir.

OLEMSABANG

AROGO-I TEREKLOK MAPA NUNG RANGLOKDANG TONGTIPANG WADANG KAR SENZÜKA TOKTSÜR

~ L.Kika Pongener

(Yashi adok nungi...)

Tanü asen atepzüng nung asen tenük agi ngua tenyaba mapa inyaktsü wadang jenti dang nangdaka lir. Tanü asen Naga lima nung tanga jilatem nung oda yutsür, Dimapur jila nung danga tetsür tekup yoka (prostitutes) kibong/taküm mesua alirtem kwika alitsü...??? Mozülar (drug addicted) kwika alitsü...??? Yi lar (alcohol addicted) kwika alitsü...??? HIV & AIDS tashitak agi tonger kwika alitsü...??? Atangji iba ama tia nung alirtemji bushia anidena temulung meyipa Yisu Khrista agizükdakja, tekümtet tejangja kaadaksütsü, aser alima shi taküm libaliro nung nungdakba teyari lenmang kar danga aguja yaritsü kanga dang rongdaka lir, aser aji talisa arogotemi inyaktsüla. Hau 'Outreach Mission' ajia tongtipang, saka iba kisung inyakba jagi teperi masü. Atangji, aji arogotemi inyaktsüba tenyaba mapatem rongnung tongtipangtiba ka asütsü.

Tanü arogotem aikati terenlok mapa (development works) nung tali ranglokdang, temalen shisema aruba wadangtemji mayimjemi zübazülema senzüka toktsüba angur. Yisu-i "Nenoki oang aser kin ajak nutsüngtem kümdakjang"... ta nungloktsüba nungji iba wadang ya-a dena lir masü no...??? Ni aibelener ka mesura NBCC Women Ministry nung kongsang tilaka "Miglat Ministry" ajanga tetsür tekup yoka pei taküm/kibong mesua alirtem (prostitutes) bushia/anidena Counselling aguja, lenmang balala nungi nungdakba teyari agutsüba kar alitsü sudi. Ano Volunteer Organization "Sila's Care Centre" (A Home For Prayer, Counselling and Restoration) ajanga drug addicted aser alcohol addicted-tem teyari nungdaka aliba nisungtem, temulonger tamang tenla agi personel counseling and prayer, bible studies, worship and spiritual guidance, personel development, skill development training etc. yamala tesayubatem aguja, temulong meyipa, taküm melenshia kümdaktsüba, mapa tajung inyakba ngua kanga temulung chia repranger. Atangji, iba mapa ya Yisu-i arogo nem inyaktsü nungloktsüba wadang tongtipang ka sernung, tanü arogotemi iba wadang ya mayimjemi toktsür ta sasaseta repranger. Arogo kari shilem tera agia inyakba dak alaka, arogo aikatibo ibala mapa ya meinyaki senzüka toktsüa lir ama reprangteter. Anungji arogotemi iba wadang ya senzüka metoktsüi khen meyipa reprangtsüla, aser rongsen intokba mesasai kanga nendak-nendaka inyaktsüla wadang tuluka lir. Ministry kwikati iba wadang nung amtaka inyakdagi, iba nungji arogotemi amalitepa/nungita yariteptsü kanga dang tongtipang lir. Atangji arogo-i dang masü, saka akokeribo shisatsü aser rongsen agi iba wadang nung pei akokba yari teka salaa tenla-a shilem agia inyaknungbo kodaka temoatsü tulu asütsü. Aji oda, arogo ka taküm aliba aser Yisu Khrista dak amanger khristan ka alima dang kulisuba tongtipangbaji ibaji asütsü. Atangji, arogo nutsüing züinba, arogo ki-o-jen, ali-kimong aika akaba, arogo senbong uluba, itumji masü, saka sama-a aliba tanelatem bushia anir arua tekümtet kaa kümdaktsüba, ibaji dang arogo ka ainbaji asütsü. Anungji arogoji alima rongsen nung takar masü, saka tanela anir aruba mapa nung takar kümdaktsütsüba inyakyim nung tuluba rangloker inyaktsü iba ocet ajanga lemsateper.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngerü angateta agitsü mepishir**

Iraq nung sorkari senso ajak kasa züngshitsüla: Pope Francis



March 05, 2021 nü Iraq Ato kilonser, Mustafa al-Kadhemi (ajichi)-i Baghdad International Airport nung aliba VIP Lounge nung Pope Francis agizükdang tangokba noksa nung angur. Pope Francis-i anogo pezünü atema Iraq linük semdang.

March 06, 2021: Pope Francis-i Iraq sorkar ketdangsertem aser nüburttem dang, linük nung tesünap aser terenlok alitsü atema senso ajak kasa züngshitsüla, aser yimchi-yimjung ajungkettsütsü atema maneni inyaksüla, ta ayongzük.

March 05, 2021 nü Pope Francis Iraq yimtiba, Baghdad nung aliba International Airport nung tonga arudang Iraq Ato kilonser, Mustafa al-Kadhemi-i pa agizüka liasü; Pope-i anogo pezünü tashi Iraq semdang.

March 5, 2021 nü Iraq Tir, Barham Salih den sorkar ketdangsertem aser Iraq nung inyaker linük balala nungi ketdangsertem den jembidang Pope-i, "Adianu ama tesünap nung alitsü atema ken o jembitsüla, judiciary-i ibaji kümzüktsüla aser ozüng akhümtsübuttsüla," ta ayongzük.

Pa den pa meina arurtem aser osangbenertem ajak coronaviurs vaccine jelia agiogo, ajüsüa Vatican nungi tayimtsü ajanga ghonda pezü tayimtsü nung arudang parnok ajaki mask agir liasü.

Osangbenertem den jembidang Pope-i, Middle East nung aliba linük (Iraq) semdangtsüji pa teinyaktsü mapa ka liasü, ta ashi.

2003 küm US-i aniba teloktep Iraq-i aruba sülen iba linük nung rara balala ajanga nisung jenti asüba den kiojen raksaba aser nisung aika jenshir linük

nüburttem, talisa Khristantem teimla samar aliba mapang ka nung pai Iraq semdang.

Pope Iraq tonga aruba sülen pai Bhagdad Airport nung aliba VIP Lounge nung Iraq Ato kilonser, Mustafa al-Kadhimi den senden tatsüka mena liasü.

Airport nungi pa yimtii aodang gari lenmang nung Iraq nung telok aikati pa dang Vatican nung wako aser Iraq nung wako ayipshia sayu.

Iraq Tiri Pope dang, coronavirus wara den külemi rara tensa liaka lendong metsübuti nai ozü linük semdangba ya Iraq nung atema kanga senti, ta ashi.

Tesüiba küm 20 tsüngda Islamic kiralongrartemi tepsetba Khristantem nem akhüm agüja Pope-i, asenoki Tsüngrem ka dak amanger, iba tetezü asenok ajak atema tebuji Pa lir, iba tetezü asenok ajak ya adianu lir, ta ashiba den külemi linük nung yimtenten aser loktiliba ajak asentenshitsü aser yangershitsü atema ayongzük.

Pope Francis-isa, pai Tsüngrem dang Iraq nung atema tatok meshitsütsü, ta ashi.

Pope Francis-i ketdangsertem dang, "Ni sasasete aser mangyima yagi aruogo, kodak nung aliba Tebu dang ni tatok meshitsür. Yimjung Chuba Yisu Khrista tenüng nung ni yimjung sangdonger ka ama aruogo," ta metetdaksü.

"Hadir amer raraba anenang! Yangi aser tesem ajaklen rara prokshiba anenang. Linük yangertem aser yimjung yanglurtem ola angashidakjang. Tesünap nung mapa inyaka aser sarasadema liner sensakertem aser nüburttem ola angashidakjang," ta pai ashi.

Pope Francis-isa Iraq nungeri democracy atema meranga inyakba atema tenüngsang agüja pai, "Iba atemaji yimtenren party ajak, lokti nung lenirtem ajak aser tamangba yimsü balalai shilem agitsüla aser senso ajak nem fundamental temeden balala agütsütsü atema inyaksüla," ta ashi.

Khristan nütsüng kanga ajema akümba linük nung Khristantem, Kurds, Yazidis aser Mandaean nung kanga bendangshidanga züngshir aser temeden magütsür.

Taoba mapang Saddam Hussein yimsüsüba mapang nung Shiite Muslim nung nütsüng aika liaka parnok nema temeden aika magütsü liasü.

Secular lenirtem den jembidang Pope Francis-i linük nung Khristantem reshikangshiba indang süoka jemi aser Khristantem temeden atema inyaksü mepishia linük tanaben asentenshia yangerba nung Khristantemi pei dak aketba sempet amshitsü, ta ashi.

Leper ka nung Iraq nung Khristan 40 tasü mang angu

March 06, 2021: Iraq security sepaitemi Iraq nung Mosul yimti anasa nisung aika aremba leper ka angu, aser iba nungji Khristan 40 densema aliba Kangki yuja aliba ajanga jangjaogo.

Parnokji tamalen Islamic State kiralongrartemi tepseter külemi rema yutsüba lir, ta Syriac Orthodox Arogoi metetdaksü.

Iraq kübok Mosul anüdoklen Halila region nung Iraqi security sepaitemi aser Al-Hashd al-Shaabi (Popular Mobilization Forces) sepaitemi leperji angu, ta

Arogoi metetdaksü.

"Tasü mangtemji külemi aremba liasü. Karbo tetsür aser tanurtema liasü. Leper nungji Kangki tilala yuja liasü," ta kasa osang ajanga metetdaksü.

2014 küm IS, ISIS, ISIL mesüra Daesh ta ajaba kiralongrartemi Iraq nung yimti tulutiba rongnung tanabuba, Mosul yimti atsünga agia liasü.

Iraq nung Nineveh Region nunga IS kiralongrartem ajanga Khristan 125,000 dak tema jenshia liasü.

Khristan Ministry- Open Doors aser parnok indang partners-i iba Nineveh region nungji Khristantem atema ki 700 jungnüa sütsüogo.

Taoba ita Georgetown University, Washington, D.C nung jembidang Iraq nung tongti putir, Bashar Warda-i, "Joko Khristantem ishika dang anünga lir, Khristan 200,000 shi dang anünga lir," ta metetdaksü. 2003 küm tashi nungbo Iraq nung Khristan nütsüng million 1.5 shi liasü.

2021 TSÜNGREMER TEJEMBIBA MANGDANG

- Amenla, Bethel Prayer Home for all Nations

Junkai Adokba 19:6-8 Idangji telok tulu ka ayimtenba ola ka ama ni angashi, aser tzü jenti arrürba ola ama aser tsüngmok tashi agi amokba ola ama liasü, aser ashi, "Haliluya! Kechiaser Ajak Takoksang, asen Kibuba Tsüngrem chubar. Asenoki lungsoa pelatepdi, aser pa nem sentsüwangshi agütsüdi, kechiaser San Chanu kiyimba mapang tongogo, aser pa kinungtsü pei sasa renema lir. Sü tanük, sentsüprang aser temerük la sasa sobutsü asoshi Tsüngremi la dang mela-a kar, kechiyong sü tanükji temeshipur temeshiba mapa lir."

Mathi 24:44 Anungji nenoka renema liang, kechiaser nenoki mebilemba mapang ka nung Nisung Chir arutsü.

24th January 2021 Sunday anepdang zungia jembiba mangdang. Alima ama metenteper kü dang sayu. Tib kelenji mepet temesung agi yanglua liasü aser teb kelenji tanak agi yanglua liasü. Aser ni iba mepet temesung nungji songer liasü. Aser yang nung jaki adoktsü asoshi ni kü metemla counsellor Alemla dang atsütetang ta ashi saka lai ni matsütet. Aser ano kelen reprang nung nisungji aika ni angu saka parnok shinga-i a kü dak meranglok aser ni meküzmük. Anungji ni asetshia, asetshia Yisu, Yisu ta ja adoktet. Aser lenmang main road tulukati ni adok aser yangji counter tulu ka liasü aser tetsür tamaraner ka counter nungji mena liasü. Anungji ni la dang ni toktsüba bag to kong ali ta asungdang aser lai ashi, "nü bag mesamai dang lir." Aser ni la dang sa asüngdang-"kü mobile kong lir na?" Lai langzü, "nü mobile nenu-i charge sutsütar." Anungji Tsüngremi asenok atema alima ana renemtsüa dokoko. Ka mepet temesung lima, aser ka tamang lima. Anungji takum kum ya temeshi pur aika iba temeshi lima jaki aotsü aser temenenpur aika tamang temenem lima jaki aotsü. Anungji mongdangtem, Arogopurtem, kija aser kibongtem asen tanela jenjang tem Kibuba dangi aotsü renemang ta ni ayongzüker. Kibuba bu pa kechi tenyaktsü ajak renema dokoko.

Ano 31st January Sunday anepdang zungia Kibubai mangdang ka sayu. Kü teka nung tesungmangtsü temeshi temerek azü packet ka sayu. Tang mapang joko asen takum nung kecha menungdak, Yisu temeshi azü jaki dang kumzüktsü akoktsü. Aser anu tesungmangtsü suntsüperang Gate ka sayu yangji anü ji tesungmangtsü hon sentsü yashia liasü. Aser ni aji sungmanga repranga alidang ola kati ashi. "Iba ji Kibuba Yisu-er Gate." Aser iba telong nungji Yisu mena lir ta ashi, aser na kenü iba ji tonga aotsü ta ola ka jaaki sa ashi.

Temeshi pur tem ajak iba ji tonga kenübu aitsü. Anungji Kibuba tsüngsü nung jaja Kibubar mapa asenok ajaki meranga inyaka atati. Ano 1st February, Monday anepdang ni room nung nokdaka liasü aser Tiajungla ta ser tetsür ka ti Register tasen ka bener room telong-i ait. Aser lai ashi juko tenung zeluokti ni? Anungji takum kum ya bo Kibubar Register nung tenung zuluba kum ka asütsü. Asenok ajak yangji tenung zeluoktsü tanela nung meshiteta atati.

Tsüngrem-i ano mangdang ka adoka sayu. Nisung ka sewing machine tulu ka amer sü arüa liasü (Tribe Ken 16 tenung zeluba). Aser iba nisung dang ji ni ashi, "sü ji aritepang." Saka pai ashi, "Ni maritepteptsütsü." Aser pai sa ashi, "Ni joko lakoko aser ni sempar." Anungji ni pa dang ashi, "Kechiba yamai ain adoker?" Tejashi kenü bu iba sü ya abener ana mejangtsü-a to. Anungji Tsüngrem-i asenok Naga nung dang temolung machir, aser kanga mepelar, asenok meputet aser majongba yong. Anungji asenok longjemti aser Tsüngrem bushiti. Asen temenen ajak nangzükti. Ashiko Kibuba Tsüngremi asenok dang aochitsü a kar.

Amos 5:14 Nenok taküm linüra tajung bushiang, tamajung masü, angji Kibuba Temeranger Tsüngrem, nenoki ashiba ama, nenok den alitsü. Tamajung sempa-ang aser tajungji meimang, aser süngkhüm nung ochiba yangluang, ashiko Kibuba Temeranger Tsüngremi, Yosef tanüngba dang aochitsüa kar.

Asenok ya jana ama okdoktsüba ka dang lir. Anungji Kibubai anak amai mokdokdang asenoki asen temenen tem bushia temolung meyiba tekumtet bushiti.

Aji asenong dang asenok ajak Yisu mena aliba Gate ji tonga otettsü. Takum ya Kibubar Jubilee kum. Anungji asenok-i dang pa bushira nisung aika kumzüktsü kum lir. Aser tashi mangara tsüksü ama septoktsü kum lir. Aika tasüba balala agi asütsü. Anungji temelung meyibang.

Tsüngremi moajang.

OLONG PAITEP # 5745

1			2		3		4		5	
6		7								
					8					
9				10						
						11				
			12							13
	14								15	
					16					
			17							
									18	
19										

TIPIEN 2. Teburtemi tejak nung awaba - (8) 6. T _ _ _ em - (3) 8. Tzük ayudak - (3) 9. Nüngdakba dang timba - (6) 11. Züina ao - (4) 12. Yangi tzü angur - (5) 14. Tangar dang nungi tali - (4) 16. Senyong masü - (6) 17. Oadokdi - (3) 18. Tzü tarok - (3) 19. Yimtaklir aikati iba ya ki den külemi yanglusemer - (8)	LANGTSÜNGLEN 1. Temejangdak - (6) 3. Nisung ka mapa inyaksü nübo- (4) 4. Azüntsü asoshi mejemba - (6) 5. Tesangwa agütsüba - (5) 7. Tila masü - (4) 10. Tebenjem tetsür chanu - (4) 11. Tekolak nung inok - (4) 12. Tetsüngda - (6) 13. Tangar inyakba ka inyak - (6) 14. Tim masü ta ashi - (5) 15. Asalendong - (4) 16. Tanü dangtsü - (4)
--	---

OLONG PAITEP # 5744 TELANGZÜBA

TIPIEN : 1. Telok, 4. Aluru, 6. Ozüng, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.	LANGTSÜNGLEN : 1. Tenükjang, 2. Luden, 3. Kiochtsü, 5. Lenti, 7. Tajangzük, 11. Teronem, 12. Sempa, 13. Jahaz.
--	--

KOMA SÜLA TELANGZÜBA

Q. Nagaland nung yi ayokba dokan odia lapokdaksü nunga koma süla?

NLN dry state ta Tsüngrem aser meimchir dang sangdongadokogo taji miima/odia lapoktsü ya bulua tejembi. Kodasur lapoka alirtem ya anentsütsü ajiang jembidi, mesüra dry agi wet state melenang.

- M.Ao 4th mile

Tamasa tatsü talang ajak bilemdangtsüla ka lir. Tamangba yimsüa maitsür saka Nagaland nung yi odia lapoktsü sorkari melatsüla. Kechiba ta süra : (1) Nagaland sorkar revenue angutsü. (2) Nisungtemi yi tajung ajemtsü aser arishia alitsü. (3) Kodang odia lapokdir yi tajemer ishiba akümstsü. (4) Kechi nokdangner ibaji inyakdangner/menakdangner timba züintsü aser (5) Nagalandji Assam den artsüa ali tashibo Nagaland nung yiji menokdangtetsü. Anungji odia lapokbaji ajak nung ajak tajungba asütsü.

- WhatsApp

Nagaland nung Yi komaka nokdangner yamaji tiemba tayoker züintsü lenmang sadema lir.

-SMS

Nagaland sorkari temelaba agütsür yi dokan lapokba tajungba asütsü. Kechiba, kinük kisang ajak nung yi angur aser angutsü.

- SMS

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Alak

(v.) Maginüi mesüra mechinüi aküm (fed up)

* Pai o tali jembiba agi onok ajak alak.

* Aenlen entsü tali achiba agi alak.

Alar

(n.)Kangshia shiruru ama amshia tenzükdaktsüba nisung (Slave)

* Abraham Lincoln-i America lima nung alar ayuba mapa aitsü.

Happy Birthday

TENÜNG : AKÜMNARO

Tasoba anogo : March 7

Küm : 10

Talidak : Ikishi village dimapur

Tajungsang Tsüngremi Jala Narola Küm ter(10) renteta anema tokja areshi moatsüba asoshi ba tenüng asanger maneni takoksang Tsüngremi Jala takokba nung areshi talang moajangta sarasatemja iba Salem osang abenur *Happy Birthday Naro.

- Temeim Oya,Oja &Oba



TANÜBO NAI LANGZÜANG

Q. Koba küm Chandrasekhara Venkata Raman-i nobel prize angu?

A.1930

B.1927

C.1925

D.1932

(Taruba adok nung onoki langzütsü)

YASHI ADOK TELANGZÜBA : 1931

SUDOKU # 5786

TELANGZUBA # 5785

4	9	7	8		5			1	2	5	6	3	8	4	1	9	7		
		2						8		1	9	7	2	6	5	4	3	8	
8			6					7		8	4	3	1	9	7	5	2	6	
								9		6	1	9	8	2	3	7	5	4	
6	8		2	3	9			5	7	5	7	8	9	4	1	3	6	2	
5								2	6		4	3	2	5	7	6	9	8	1
					1			9	8		7	2	4	6	3	9	8	1	5
7	4	6	5					1	2		9	6	5	7	1	8	2	4	3
	1							7			3	8	1	4	5	2	6	7	9

OJANG LUTEP # 5332

LOTEK	:	<input type="text"/>
NGNU	:	<input type="text"/>
IRSH	:	<input type="text"/>
MNE	:	<input type="text"/>
ECKHI	:	<input type="text"/>
TASÜTSGÜTÜ	:	<input type="text"/>
ITM	:	<input type="text"/>
JAKAJI	:	<input type="text"/>
NSAABEA	:	<input type="text"/>
JANATAG	:	<input type="text"/>

OJANG LUTEP TELANGZÜBA # 5331

ALIMA NUNG TULUR TILAR TAKAR SENSAKER AJAK PEI SASEP LIBALIROR

TAN HOPTA ATEMA - KOMA SÜLA ?

Q. Asenok sobaliba nung ali senmang amangtepba yimya ya, akhi tsürabur senmang aser tanü putu senmang ta ana küma bendanger amangtsü tenzüc nunga koma süla?



Ahmedabad, March 06, 2021: Honibarnü Ato kilonser, Narendra Modi Ahmedabad yimti nung aliba Airport tonga arudang Gujarat Angh, Acharya Devvrat aser Chief Minister, Vijay Rupani nati pa agizükba noksa nung angur.

Aluyimertemi Kundli-Manesar-Palwal lenmang ghonda 5 mokdang

New Delhi, Metsüremi/ March 06 (Agencies): Linük nung aluyimertemi Centre sorkari benokba aluyimba ozüing tasen asem anema longkak ait tenzüker anogo 100 ajungba anogo- Honibarnü aluyimertemi Kundli-Manesar-Palwal (KMP) Expressway ghonda 5 tashi mokdanga liasü.

Honibarnep aluyimertem gari, trucks aser tractor nung iba highway jagi aoba sülen ghonda pongu tashi mokdang.

Aluyimertemi anüngdang 11:00 ako nungi nikongdang 4:00 ako tashi iba lenmang mokdangba mapang nung toll plazas nung sen mesarudaksü.

Singhu arrtsü nung aluyimertemi KMP Expressway leni aoba lenmang

nung toll plazas ajak mokdang aser Ghazipur den Tikri arrtsü nunga parnoki Dasna aser Bahadurgarh toll plaza mokdang. Shahjahanpur arrtsü nunga aluyimertemi Gurugram-Manesar leni aoba KMP Expressway mokdang.

Osangbener den jembidang Yogendra Yadav-i aniba Jai Kisan Andolan nung Haryana state Tir, Karamjit Singh-i, "Modi sorkari aluyimertemi longkak aitba ya tekong merangba onük ka kümdaktsüogo. Parnoki aluyimertem timtem memeteter," ta ashi.

Honibarnüa maneni Centre sorkar aija Congress lenir, Rahul Gandhi-i, aluyimertemi parnok temeden atema rarar, ajisüaka sorkari parnok reshikangshir, ta

ashi. Rahul-i twitter ajanga Hindi oshi nung, "Linük arrtsülen taküm bendang agütsür (sepaitem) jabasotem (aluyimertem) atema Delhi arrtsü nung kojajal yutsür. Aluyimertemi parnok temeden atema akhanger saka sorkari parnok reshikangshir," ta aitsü.

November ita tatembanglen nungi aluyimertem aika Delhi arrtsülen adenshia ozüing asem anema longkak aiter. Parnoki asükwa tizükteta aruogo aser maneni tzüngluruwa ajurutsü.

"Asükwa mopung temekong agia onok longkak aitba menokdangtet, aser tatsük agia onok menokdangtettsü," ta Punjab nungi aluyimer arrshi küm 58, Raja Singh-i ashi.

EC-i Covid Vaccine Certificate nung PM Modi noksa mamshitsü tuyu

New Delhi, March 06 (Agencies): TMC lenirtemi Election Commission nung ketdangsertem ajurua, Covid-19 vaccination certificates nung Ato kilonser, Narendra Modi noksa keta aliba ya election model code of conduct (MCC) alema lir, ta ashiba sülen Election Commission-i Union Health Ministry dang MCC shidak benshitsu tuyuogo.

EC-i shidi ka ajanga health ministry dang, sorkar senpong nungi advertisement atema sen amshibaji model code alema lir, ta metetdaksü.

Osang angazükba agi, Election Commission-i nija tenüing shinga metetshi,

ajisüaka Health Ministry election model code shidak benshitsu tuyu.

Iba tetuyuba nungji ajemdaker Health Ministry-i assembly election agitsü aliba state tem- West Bengal, Tamil Nadu, Assam, Kerala aser Puducherry nung coronavirus vaccine agirtem nem agütsüba vaccination certificate nung Ato kilonser noksa mamshitsüa akok.

Mongolbarnü TMC-i Election Commission nung ketdangsertem ajurua coronavirus vaccine agirtem nem Co-Win platform ajanga agütsüba Covid vaccination certificates nung Ato kilonser

noksa keta aliba ya assembly election agitsü aliba state tem nung model code of conduct ozüing alema lir, ta ashi.

Vaccination certificate nung iba noksa amshiba ya Ato kilonseri official machinery tim mesüi amshiba lir, ta TMC lenirtemisa metetdaksü.

Model code nung yamai shia lir, "Tashi nung aliba party jenjang tajungba kümdaktsütsü atema sorkar senpong nungi advertisement atema senotsü mamshitsüla."

Model code of Conduct ya February 26, 2021 nungi tenzüka Assam, West Bengal, Tamil Nadu, Kerala, aser Puducherry nung benokogo.

Myanmar nung temelenshi atema India ya tongti partner ka lir: UK

New Delhi, March 06 (Agencies): Myanmar linük nung temelenshi adokdaksütsü atema India ya tongtibang partner ka lir, ta United Kingdom-i metetdaksü.

February 1, 2021 nü Myanmar nung sepaitemi democracy lenirtem pua emergency sangdonger sepaitemi yimsüsü tenzüka sülen nüburtemi longkak aйдang nisung 50 dak tema süogo, aser anogo shia tensa tamajungba akümer.

Osangbenertem den jembidang India nung British high commissioner tasenba, Alex Ellis-i, "Iba tensa tamajungba kümogo, iba ya tebilemsü tuluka lir. Tensa melenshidaktsütsü atema India ya tongtibang partner ka lir. India-i kechi koma inyaksülar ibaji parnok melung. Asenoki sepaitemi yimsüsüba anema

inyaktsüla," ta ashi. United Nations Security Council nung UK yakbang ser Myanmar tensa atema jembidar. United Nations human rights council-ia Myanmar tensa mita repringdar aser linük aikati tang Myanmar linük nung atalokba ya aitsüogo.

High Commissioner, Alex-i, "Kobi meli UK Ato kilonser, Boris Johnson-i India semdangtsü aser taküm India Ato kilonser Modi-a G7 summit nung adentsü atema UK-i aotsü," ta metetdaksü.

UK Parliament nung India nunger aluyimertem longkak aitba onük jembitsu aliba dak sendakba nung tasüngdangba ka langzüdang Alex Ellis-i, "Iba ya India nunger telung onük ka lir, ajisüaka India nung tatalokbatem ajanga UK-a kongshir, kechiyong UK nung India nunger aika lir, ta ashi.



Prayagraj (Uttar Pradesh) March 06, 2021: Honibarnü Prayagraj nung aliba hospital ka nung tain ka nem COVID-19 vaccine tutsüba noksa nung angur.

West Bengal nung bomb lendong ka nung BJP nung inyaker 6 yiru

Kolkata, March 06 (Agencies): West Bengal nung South 24 Parganas district kübok Gosaba yimdak bomb ka apokba lendong nung nisung trok yiruogo; parnok bomb yangludang lendongji atalok, ta Honibarnü police-i metetdaksü.

Yasüing (Hokolbar) iba lendongji bomb lendong nung yirur ka kidang atalok, aser mezüing bushisüngdang ajanga yirua alirtemji BJP nung inyakerem lir ta jangjaogo, ta Honibarnü police ketdangser kati metetdaksü.

Tang parnok Canning Sub-Divisional Hospital nung yaridar,

ta pai ashi. Ajisüaka iba lendong nung yirua alir kinüngertemibo, BJP nung inyakeremji kiyimba benjung ka nung denner kidangi meyipa aruba mapang nung Trinamool Congress (TMC) nung inyakerem bomb amshia amak, ta ashi.

"Parnok kinüngertemi jembibaji onoki angashigo. Parnok bomb yangluba mapang nung iba lendong atalok asütsüa akok. Onoki iba tatalokba bushisüngdangdar aser iba tesem anasa alirtem den-a metetpeladar," ta police ketdangserisa metetdaksü.

Küm ana tsüngda Gir sanctuary nung molusongzü 313 süogo

New Delhi, March 06 (Agencies): 2019 küm aser 2020 küm Gir sanctuary nung molusongzü 313 süogo, ta Gujarat Assembly nung sorkari metetdaksü.


Assembly nung opposition züngsemtemi mapang tatsüka tsüngda molusongzü aika asüba kuljiji kecha ajanga, ta

takhangba agüja liasü. Forest Minister, Ganpat Vasava-i, küm ana tsüngda molusongzü tebung 71 asüba nungi 69 bo shiranga asü aser molusongzü tetsü 90 asüba nungi 77 shiranga asü; molusongzü chanu 144 shiranga asü aser tanüingba ti tanga kuli balala ajanga asü, ta metetdaksü.



New Delhi, March 06, 2021: Honibarnü New Delhi nung taoba mapang Union Minister, Dinesh Trivedi-i BJP Tir, J P Nadda ket nungi party membership slip meshidang tangokba noksa nung angur.

Pakistan PM Imran Khan-i NA nung trust vote akok



Pakistan Ato Kilonser Imran Khan-i Honibarnü National Assembly nung trust vote agiba noksa nung angur.

Islamabad, Metsüremi/March 6 (Agencies): Pakistan Ato Kilonser Imran Khan-i Honibarnü National Assembly nung trust vote ka kokogo. Vote agiba nung Opposition party maden.

Tir Ato Arif Alvi tetuyuba nung special session ka ayongzüka agiba mapang Ato Kilonser Imran Khan-i züngsem 342 agi kümtetba Parliament lower house nung vote 178 angu. Simple majority ka atema vote 172 nüngdaka liasü.

Floor test ya Opposition party medeni agiogo, kechiyong party 11 agi kümtetba Pakistan Democratic Movement (PDM)-i vote agütsüba nung shilem magitsü atema telemtetba agi.

Bodhbarnü Senate election nung finance minister Abdul

Hafeez Shaikh tamakok anguba sülen Khan-i Parliament lower house nung vote of confidence ka agitsü atema telemtetba agi. Election agiba sülen Opposition-i Ato Kilonser mapa nungi anentsü atema khanga liasü.

Foreign Minister Shah Mahmood Qureshi-i House nung single-point resolution ka table süogo.

"Islamic Republic of Pakistan Constitution Article 91, clause (7) kübok Islamic Republic of Pakistan Ato Kilonser Mr Imran Khan dak house-i maneni tamang akar," ta bangzüng nung shia lir.

Simple majority ka atema züngsem 342 nungi vote 172 nüngdaka liasü. Teloktep sorkar kübok züngsem 181 liasü, saka Faisal Vowda-i mapa toktsüba sülen 180 aküm. House nung

Opposition züngsem 160 lir aser menden ka tazüng lir.

NA nung Pakistan Tehreek-e-Insaf (PTI) züngsem 157 lir saka Vowda-i mapa toktsüba sülen 156 dang kümogo. Ruling party-i trust motion mapang Vowda-i vote agütsütettsü ta ashi, kechiyong pa mapa nungi anentsü benokba ano magizüki lir. Ajisüaka mapa nungi anentsü atema shiti agüjatokerji pai vote magütsütettsü, ta Opposition-i ashi.

Pakistan nung teloktep sorkar kübok Muttahida Qaumi Movement (MQM) züngsem tenet, Pakistan Muslim League-Q (PML-Q) aser Balochistan Awami Party (BAP) nungi pongungu, Grand Democratic Alliance (GDA) nungi asem aser AML aser JWP nungi kaka lir.

Afghanistan Helmand province nung nisung 3 pokset

Kabul, Metsüremi/March 6 (Agencies): Helmand province nung Honibar anepdang Lashkargah nung provincial police headquarters anasa nisung asem poksetogo, ta TOLO News sangdong ka ajanga metetdaksü.

Bomb apokba lendong nung Helmand nung National Directorate of Security (NDS) prosecutors' office in charge Sayed Mahmood Sadat dena poksetogo.

Sadat'er kinungertemi ashiba agi, iba lendong nung pa indang security guards-a dena ana

poksetogo, ta TOLO News-isa metetdaksü.

Tang tashi nung iba bomb pokdaksüba indang Taliban densema telok kati danga nangzüka mali.

TOLO News data ajanga ashiba agi, February ita linük kübok tesem balala nung civilian aser security force 270 tepsetogo aser nisung 173 dak tema yiruogo.

Maneni February ita Afghanistan nung IED bokdaksüba, lenmang tezülen bomb pokdaksüba, nisung/telok rangloker amakba aser Taliban-

i amakba densema security dak sendakba nung tatalokba 166 ataloka liasü.

January ita TOLO News bushitsüngdang ajanga Afghanistan nung nisung 271 tepsetba ngutetogo aser kasa mapang nung nisung 347 yirua liasü.

Security dak sendakba nung tatalokbatem ya Afghanistan nung Kabul, Nangarhar, Herat, Kandahar aser Faryab densema yimti tulutem nung IED pokdaksüba aser nisung/telok dak rangloker amakbatem timba liasü, ta data ajanga sayuogo.

Myanmar: Myitkyina, Myeik aser Dawei nung maneni longkak ait

Yangon, Metsüremi/March 6 (Agencies): UN special envoy-i Security Council dang sepaitemi tashiyim amshiba anendaksütsü atema mepeshiba sülen anogo ka lir Myanmar nung maneni Honibarnüa security force temi longkak aitertem senshidaksütsü atema tashiyim amshia liasü. Iba hopta longkak aiter 50 shi süogo aser aika yiruogo.

Honibar anepdang Yangon yimti nung nüburtemi maneni longkak ait, kong parnok dak stun grenades aser tear gas poklokja liasü. Bodhbarnü nisung 18 tashi tepsetogo.

Kachin state yimtiba Myitkyina, southeast nung Dawei yimti nunga longkak aitertem dak tear gas khaloktsü. Maneni Mon state nung Kyaikto yimti, Kayah state yimtiba Loikaw aser Myingyan yimti nung longkak aita liasü, kong Bodhbarnü longkak aitertem tepseta liasü.

Azütokshi tali akümba ajanga junta azüoktsü asoshi linük balalai jenjang agitsüsa kümogo. February 1 nü army-i Aung San Suu Kyi-i aniba sorkar

atsüngtokba sülen Myanmar nung mepetmesü tulu adoka arudar. Myanmar nung democracy benoktsü atema küm aika meylongi inyaka aruba iba coup ajanga ajak melenshitsuogo. Myanmar ya military yimsüsüba kübok küm tenemshi kangshia aruogo aser ibayongji linük balala tenokdangba balala agütsür liasü.

Suu Kyi-i aniba National League for Democracy party-i 2015 küm election koka nüburtemi yimsüsüba tanaben benok aser taoba küma vote aika agi election koka liasü. Parnoki ano küm pongu yimsüsür lila ajisüaka iba melena Suu Kyi aser tir Win Myint densema lenirtem aika sota ayu.

February nungi yimti aser jila aika nung anogoshia longkak aita arudar aser security forces temi tashiyim amshiba den longkak aiter aika pua arudar. Deobarnü nisung 18 aser Bodhbarnü nisung 38 tepsetogo ta UN Human Rights Office-i metetdaksü, Tang tashi nung nisung 1000 dak tema puogo, ta independent Assistance Association for Political Prisoners-i ashi.



Formosa, Argentina nung COVID-19 tashidak menar tali akümba ajanga tenokdangba tesashi agütsüba anema nüburtemi longkak aitba noksa nung angur.

Afghan tir Ghani-i US envoy den ajurutep

Kabul, Metsüremi/March 6 (Agencies): Afghan tir Ashraf Ghani-i Honibarnü, yimjung atema sensaksemtsü asoshi lenmang sadema lapoktsütsü atema election agishitsü asoshi pai aniba sorkari renema lir, ta ashiba den koba teloki aniba sorkar südir süaka democratic inyakyim ajanga dang shimtsüla ta nenshia ashi.

"Election ajanga dang tashi melentepstüla aser iba nungi onok masetshitsü," ta Ghani-i, parliament session lapokba mapa ashi.

"International lokti tawabangba kübok tebandang kecha makai sadok sadoka election agitsü atema onok renema lir. Election atema anogo shimtsü asoshi sensaksema telemtetba ka agitettsü," ta pai ashi.

Tir Ghani-i, Taliban den yimjung atema sensaksem bangdaker aliba tejakleni bener aotsü atema sensak asemtsü asoshi Afghanistan dangi US special envoy Zalmay Khalilzad den taoba hopta Kabul nung ajurutepogo. Kabul nung sensaksema sülen Khalilzad

Kabul-iao.

US tir Joe Biden indang administration-i, Afghanistan atema tasa asadangshitsü atema tenzüikogo, kong Taliban den 2020 küm nangzüktepba densema lir.

Afghan ketdangser aser western diplomats temi ashiba agi, Kabul semdangba mapang Khalilzad-i, Afghan aser Taliban lenirtem linük adena orr multilateral conference ka atema adenshiba sülen interim sorkar ka amenoktsü atema tebilemdangba ka benokdanga liasü.

Ajisüaka Ghani-i ashiba agi, election ajanga dang sorkar kümtettsüla.

"Tashi angutsü atema lenmang balala bushirtem dang, Afghanistan nung yimden yimsüsüba tashi angutsü atema kishi ka lir aser sabiji Afghan nungertem vote lir ta metetdaksüner," ta pai ashi.

"Institution kati shitibak ka nung Afghanistan atema tebilemdangba ka zülutsütsü akok. Iba amala shitibak nung taoba mapanga zülüogo aser tarutsü nunga zülutsü. Onoki temelaba agütsübaji onok indang constitution lir," ta pai ashi.



Entebbe airport nung Uganda indang Minister of Health Dr. Jane Ruth Aceng (teyongtsü nung tachichi), aser tanga ketdangsertemi linük dangi yokba mezüngbuba AstraZeneca COVID-19 vaccine agizükba noksa nung angur. Iba vaccine ya Serum Institute of India nung yanglu aser global COVAX initiative ajanga agütsü.

Snapdragon 888 SoC aketba Realme GT 5G saya

Realme GT 5G

goes official

- 120Hz AMOLED display
- Snapdragon 888 SoC
- Android 11 OS
- VC Cooling system



New Delhi, Metsüremi/ March 06, 2021

(Agencies): China indang smartphone yangluba company Realme-i 'Realme GT 5G' ta nungja agütsüba smartphone tasen ka sayaogo. Realme flagship smartphone tasenba nung Qualcomm meyong flagship processor - Snapdragon 888 inoka yanglutsüogo aser iba device jenjang CNY 2,799 (sen 31,500) alitsü.

Realme GT 5G nung triple rear camera setup angutsü aser Android 11-based Realme UI 2.0 out-of-the-box ajanga tashi agütsür.

Realme GT 5G - 8GB RAM + 128GB storage model jenjang CNY 2,799 (sen 31,500) aser top-spec 12GB RAM + 256GB storage variant jenjang CNY 3,299 (sen 37,000)

alitsü. Iba smartphone ya sentsü ana - Blue aser Silver nung angutsü.

Sentsü ana den külemi company-i Vegan Leather edition sayaogo aser March 10, 2021 nungi tenzüka iba smartphone edition ayoktsü.

Specifications tsütsü repringdangra, Realme GT 5G nung 6.43-inch super AMOLED display den FHD+ resolution aser 120Hz refresh rate den 1000 nits peak brightness dena lir. Tekümzüksü atema, iba smartphone display nung Corning Gorilla Glass 5 meyibangtsüogo aser tekolaklen hole-punch design angutsü.

Iba den bendenloksema, Realme GT 5G inyakyim ya Qualcomm Snapdragon 888 SoC paired den Adreno 660 GPU aser

12GB RAM ajanga achaayangtsür. Phone internal storage 256GB angutsü aser battery tasazük 4,500mAh alitsü, koba 65W fast charging support asür.

Camera atema, Realme GT 5G tesülen triple camera setup ka angutsü. Iba setup nung 64-megapixel primary shooter, 8-megapixel wide-angle lens aser 2-megapixel macro lens dena lir. Iba smartphone tejaklen, selfie aser video calling atema 16-megapixel selfie shooter inoktsüogo. Item lens den yarisemtsü atema, camera nung tanga feature talisa ProRAW mode, AI selfies, 4K video recording - 60fps aser camera dak sendakba aika angutsü.

Connectivity tsütsü repringdangra, Realme GT 5G nung dual-mode 5G, 4G LTE, Wi-Fi 6, Bluetooth 5.2, GPS, USB type-C port aser 3.5mm headphone jack ka angutsü.

Maneni, tanga shishilembadak Realme GT 5G sayatsü asoshi company ajanga telangzüba magütsü, saka osang ajanga angazükba agi India shishilembadak iba smartphone yakta sayatsü imlar.

MULUNGNEN O



24.08.1965 - 28.02.2021

Onoki teti meima aliba ojala asür **MRS. MOAJUNGLA JAMIR**, khen atema ali shi temang pilaba dangashi, tanüla nungbo asenok teti longjema lir.

La shirang yipden nung alidang aser asüba anogo nungi tanü tashi, kija-kibong aser lokti tentet kwinakati ojala dang temeim tulu sayua aser mulungsoa nübu, rongsen, shisatsü aser tamang sarasadem agi onok yariogo, nenok ajak dang kinüngertemi pelaba metetdaksür.

Nenok mapa tajung yari onoki kecha meyipa magütsüteter, saka asen teyanglur Tsüngrem tulusangi nenok taküm aser wadang nung talubusa moajangma ta sarasademtsür.

- Temeim Kinungbo, chirnur aser Kinungertem.

GOVERNMENT OF NAGALAND

DIRECTORATE OF INDUSTRIES & COMMERCE

email: industrynaga@gmail.com, e-fax: 08468825666

www.industry.nagaland.gov.in

IND/TECH/MSME-C/4/2008 //

Dated Kohima, the 22nd feb, 2021

INFORMATION

Pursuant to changes made in the classification of the MSMEs and its modus operandi issued vide Notification no. S.O. 2119 (E) dated 26.06.2020. Ministry of MSME, Government of India, it is to inform that all enterprises registered under the erstwhile Entrepreneurs Memorandum -1 & 11 and the Udyag Aadhar Memorandum Registration will now need to mandatorily re-register under the new Udyam Registration of the Ministry of MSME, Government of India for eligibility of registration validity. The last date for re-registration is 31st march 2021.

- * The registration portal is www.udyamregistration.gov.in
- * Only Aadhaar number will be enough for the registration.
- * PAN & GST linked details about investment and turnover of enterprise will be taken automatically from Government database.
- * PAN & GST number is mandatory from 01/04/2021.
- * No enterprise shall file more than one Udyam Registration. However, any number of activities including manufacturing or service or both may be specified or added in one Registration.
- * Our single window system at Champion Control Rooms at MSME-DIs and DICs will act as facilitator in the process.
- * Registration process is totally free. No Costs or Fees are to be paid to anyone.

Issued by DIPR

(K. HOKISHE ASSUMI)
Director of Industries & Commerce.

GOVERNMENT OF NAGALAND
PERSONNEL & ADMINISTRATIVE REFORMS DEPARTMENT
(PERSONNEL 'B' BRANCH)

C I R C U L A R

Dated: Kohima, the 4th March, 2021

NO. PAR-B/7/2007 NPSC : Applications are invited from serving officers under the State Government holding analogous post or immediate lower pay level for filling up of the post of Controller of Examinations on deputation in the Nagaland Public Service Commission in Pay Level -16 (79,900-1,93,700) per month and all other allowances as admissible under the rules in force in Nagaland.

Eligibility criteria are as follows:

- Post graduate in any discipline having adequate experience in conducting examinations.
- Must already be serving in Pay Level - 16 (79,900-1,93,700) per month or at least 5 years in the Pay Level - 15 (67,300-1,89,300) per month.
- Candidate with higher scale will be given pay protection.
- The period of deputation shall be for 03 (three) years.
- All application should be recommended by the respective Controlling Officers of the Department.
- The Application may be addressed to Principal Secretary, Personnel & Administrative Reforms Department, Nagaland Civil Secretariat, Kohima. The last date of receiving applications will be 31-03-2021.

Issued by DIPR

Sd/-
(J. ALAM) IAS
Chief Secretary to the Govt. of Nagaland.

MULUNGNEN O

Late. Bendangsangla (Khar)

Onoki teti meima aliba asür **BENDANGSANGLA (KHAR)** la iba lima doktsür aodang shirnokisa, nübu, rongsen, shisatsü aser tamang sarasadem agi onok den yaritepogo, nenok ajak dang kanga pelaba lemsateper. Maneni takoksang Tsüngremi nenok moajang ta onok tamang sarasadem.

- Temeim Kinungertem



Aso: 03/10/1919
Asü: 02/03/2021

GOVERNMENT OF NAGALAND

OFFICE OF THE GENERAL MANAGER, DISTRICT INDUSTRIES CENTRE
CHOZUBA, PHEK, NAGALAND.

No. DIC/CZBA/TRG (RAP)/181/2006/

Dated

Chozuba the _____ March 2021

ADVERTISEMENT

Application are hereby invited from bonafide local candidate for undergoing 9 (nine) months cutting and tailoring Training under Rural Artisan programme (RAP) at District Industries Centre Chozuba, Phek. The training will commence from 1st April to December 2021.

Number of trainees will be 10 (ten) and Education Qualification for the candidate will be Class- viii (eight) passed and above. The candidate will have to appear an interview on 24th March 2021 at DIC Chozuba in the office chamber of the undersigned in their own expense and no separate calling letter will be served in this connection. The candidate should bring their original certificates during the interview without fail.

The applications along with the photo copies of the documents should reach the office on or before 22nd March 2021.

Documents required; 1. Indigenous Certificate 2. Schedule tribe certificate 3. Certificate for proof of education qualification.

The selected candidates will be provided with a stipend of Rs 500/- per month during the training. The training is being imparted for self employment.

(CHOLZO SOPHIE)
General Manager
District Industries Centre,
Chozuba, Phek Nagaland.

Issued by DIPR

1st D-Box Penalty Shootout 2021 Rongpang Reju Arkong (RRA)-i benogo



D-Box Penalty Shootout 2021 champion team Rongpang Reju Arkong (RRA) pur den iba asayamung sponsor Wb. Moatoshi Tzüdir aser tayongertem külemi tangokba noksa nung angur. Mokochung, March 06, 2021

Mokokchung, March 06 (TYO): D-Box teloki ayongzüka mezüngbuba Penalty Shootout 2021 yangi Imkongmeren Sports Complex Mokochung nung takok ngua kaogo. Iba asayamung ya 1st Class Contractor aser NDPP Active Member, Wb. Moatoshi Tzüdir-i senotsü teyari agütsür (sponsor süa) katsü.

Taküm iba asayamung nung telok 42-i shilem tajung agia liasü. Item rongnung tesüsabuba asayaji Rongpang

Reju Arkong (RRA) aser Cats & Dogs na asayaba RRA teloki takok tulu ngua taküm parnoki iba marok benogo. Takoker champion telok nem senpet trophy den certificate aser sen 20,000/- aser tanabuba runner up nem certificate den sen 10,000/- agütsü.

Iba sentong nung Moatoshi Tzüdir-i jembidang, saisapong ajanga tashi angaba, taziökba, taremezük, ochishiba aser telungjem ajungkettsür aser

taküm jenjang yabo saisapongba nungi dang ajangzüker, ta ashi.

Asayaba ya takok angutsü kisüng dak rangloker masü pelapela asayatsüla aser asayar/nisung tajung ka akümtsü nükjidong yur asayatsü asoshi pai ajungshia liasü. Koba mapa südir süaka, alizüng tejangja yur meranga inyaksüla, kechiyong ibaji ajanga taküm junga alitsü aser asen nükjidongtem atalokba nung yaritsü, ta paisa shisem.

ISSF World Cup: Manisha teyari ajanga team silver medal angu

New Delhi, Metsüremi/ March 06, 2021 (Agencies): Cairo yimi kübok asaya aliba World Cup nung, Hokolbarnü India tsür asayar/shooter tasen Manisha Keer teyari ajanga team-i silver medal takok nguogo. Manisha ya Bhopal nungi aser la tebu ya angopur ka lir.

Tesüiba küm ishika tejakdang tashi arishi küm 20 tain Manisha-i pa tebu den külemi angopulen yaritepa aru aser tenati apuba angotem Bhopal shishilembadak ayok. Mapa nung tebu den yarisema inyakba dak alaka la dak sempet tajung aliba ajiteta, 2013 küm, MP Shooting Academy ajanga Manisha shim. Tesüiba küm asem tejakdang, Korea nung World Junior Shooting Championship tetoktepa mapang 'trap' asayamung nung Manisha-i 115/125 tashi tongteta world record yangluogo.

Taküm indang mezüng International Shooting Sport Federation (ISSF) World Cup Shotgun stage nung, Hokolbarnü, India trap team tetoktepa nung India tsür Manisha, Kirti Gupta aser Rajeshwari Kumari nungeri shilem tajung agiogo. Shooting sabang nung ajemoker külen nungi, Manisha-i international medal 12 - gold ana, silver trok aser bronze pezü ngua lir. Kasa mapang, national tetoktepa nung lai medal 33 nguogo.

Iba trap trio asaya nung India

tetsür shooter team yagi Russia tetsür team den meranga tetoktepa liasü, kong 0-4 nungi India shooter temi Russia tsür menepa (4-4 tie) asaya. Ajisüaka, final nung tie asüba ajanga team shia nem shot 15 melaa aser iba nungi tajungtiba shim.

Iba mapang, Manisha-i score timtiba angu, kong score 175 nungi lai 158 tongtet. Ano külen, Rajeshwari-i 143 aser Kirti-ia 143 ngua India indang score 444 tongtet. Tetokteper Russian team-i 463 aser asayamung ayonger team Egypt-i point 405 angu.

Iba World Cup nung India squad-i medal ana nguogo, kong tebur Skeet team-i bronze medal ngua lir. Final masayadang, Trap Mixed Team tetoktepa nung, Manisha aser Kynan Chenai nati tanabuba India team tenüng nungi shilem agia liasü aser tenati point 133 tongteta team 14 nungi jenjang 9buba nung tembang.

India nung Manisha tebu Kailash Keer-i iba osang angashia kanga peladok. Manisha'er adianutem/kinungertemi TV nung iba asaya mereprangtet, saka Manisha-i phone ajanga India team-i gold medal nguogo ta osang agütsüadang lar kinunger peladok.

"Ni shooting asaya indang kecha memetet, saka linük atema lai tenüng tajung bener arutsüogo aser ibaji

ajangzüketba ajanga la pelabaji dang ni metet," ta Kailash-i ashi.

Manisha'er adianu/kibong ya Bhopal tezülen Gauragaon nung alir, kong Manisha tebu ya angopur ka ama inyakdar. Par ki tesülen ali tila ka nung aosotsütem tsünüdar.

"Manisha kidang alidang lai teti ku den ango apui aoer," ta Manisha tebu ashi.

Iba asayamung nung India tetsür team-i silver medal anguba osang angazüka, Sports minister Yashodhara Raje Scindia-ia Manisha nem tenüngsang agütsüogo.

"La dak iba asaya sempet aliba tanaben sayuogo. Manisha-i iba jenjang tashi nung shilem agitetba ngua onok nümaatanger. Alima ajunga asüngba coronavirus wara tesashi liaka, lai shilem tajung agia iba jenjang tongtetba ajanga team nungi asayartem asayatsü jangraba aser renema aliba kuli sayur," ta minister-i ashi.

Madhya Pradesh nungi tetsür shooter temi International sabang nung junga shilem agidar aser iba den külemi parnoki national aser state atema medal takok ngua tenüng tajung bener arutsüogo," ta MP Shooting Academy indang coach Mansher Singh nem tenüngsang agütsüba mapang Minister-i ashi.

MP Shooting Academy nung Manisha shimba sülen, coach Mansher Singh tawabangba kübok la training agi tenzüik.

Road Safety World Series: India Legends-i Bangladesh Legends kokogo

Raipur, Metsüremi/March 06, 2021 (Agencies): Hokolbarnü, Shaheed Veer Narayan Singh International Stadium nung India Legends aser Bangladesh Legends na tsüngda Road Safety World Series T20 asayaogo. India Legends-i wicket 10 agi Bangladesh Legends kokogo.

Iba T20 asaya nung Indian legends nungi takotet batsman ana - opener Virender Sehwag aser captain Sachin Tendulkar nati taoba ama batting sempet tajung amshia asayaogo. Bangladesh Legends-i run 110 target yutsü, saka asaya tanabuba innings nung Sehwag aser Sachin nati ayong ayonga dang over 10.1 nung run 114 tashi yanglutet.

"Nawab of Nafagarh" ta nungja agütsüsang - Sehwag-i ball 35 nung 4' ter aser 6' pungo densema run 80 yanglu aser Tendulkar-i ball 26 nung 4' pungo densema run 33 bendenloksü. Iba asaya tenzüki nungi Sehwag-i atsüayonga meli ball ajak züklokja asaya. Mezüng over Mohammed Rafique-i aon aser iba over nung Sehwag-i 4' asem aser 6' ka densema run 19 yanglua liasü.

Bangladesh bowler dang taochi tilaka danga mesayui Sehwag-i ball ajunga nung run angutsü meranga asaya. Fast bowler Alamgir Kabir indang over nung Delhi nungi batsman takotet Sehwag-i taoba mapang asayaba ama 'six' ka züklokja half century tongtet.

Sehwag-i half century yanglu sülen, mapang magii Indian Legends-i iba asaya koktet. Medium-pacer Khaled

Mashud indang over nung Sehwag-i six' ka züklokja team-i iba asaya takok angu.

Mezüng, Bangladesh Legends-i toss koka batting shim, saka batsman temi bilemba ama junga masayatet aser over 19.4 nung parnoki run 109 dang yanglur asayar ajak out süadok.

Bangladesh opener Nazimuddin-i team atema run timtiba yanglu. Nazimuddin-i ball 33 nung 4' ti aser 6' ka densema run 49 yanglutet. Pa den kulem team pur rongnung Javed Omar-i run 12 aser Rajin Saleh-i run 12 yanglu. Tanüngba batsman temi run 10 tekübok dang yanglur out süadok.

Indian Legends atema bowler rongnung Vinay Kumar, left-arm spinner Pragyan Ojha aser Yuvraj Singh nungeri wicket anana agi.

Bangladesh opener Nazimuddin aser Omar nati junga asaya tenzüik aser tenati run 59 yanglur aliba mapang, Nazimuddin out süadok. Ano, over 8 nung Ojha-i Omar out sütsü aser tanüngba wicket tuku run 50 nung out sümadok.

Bangladesh team nem run aika magütsütsü atema India spinner temi ball junga yok aser ibaji ajanga run azüokba den Bangladesh batsman temi run 109 dang yanglur atonga out süadok

Iba asaya nung team ana score yamai alitsü: Bangladesh Legends 109 (Nazimuddin 49) India bowler tem :- R Vinay Kumar 2/25, P Ojha 2/12 aser Yuvraj Singh 2/15)

India Legends 114 (Sehwag 80* aser Tendulkar 33*).

ICC World Test ranking nung India temaba jenjang tongtetogo

Dubai, Metsüremi/March 06, 2021 (Agencies): Honibarnü, India aser England tsüngda Test series pezübuba aser tatembuba asayaogo. Iba Test series final asaya nung India-i innings ka aser run 25 agi England tsükdaktsü aser parnoki iba series 3-1 agi akokba den külemi ICC World Test Championship ranking nung temaba jenjang tongtetogo.

"India team-i England madak takok anguba yong ICC World Test Championship indang league telesa nung parnoki table teamaba jenjang tongtetogo," ta Twitter ajanga ICC-i lemsatop.

India nungi bowler Axar Patel aser Ravichandran Ashwin nati England batting line-up amokbanga asayatet aser England team akokba

ajanga India team-i World Test Championship final nung asayatsü maongka nguogo.

Iba league telesa nung India team-i point 520 tashi ngutet, kong 'takok' 12, 'tamakok' 4 aser draw ka dena lir.

ICC World Test Championship final, koba taküm June ita nungtugu Lord's Stadium nung asayatsü renema lir, iba asaya India aser New Zealand tsüngda tokteptsü.

ICC World Test Championship ranking nung New Zealand pur jenjang tanabuba nung lir. New Zealand team-i 'takok' 7 aser 'tamakok' 4 densema point 420 tongteta lir.

Ano, Australia-ia point 332 tashi nguteta England aser Pakistan tejakdang jenjang tasembuba tongtetogo.

BILEMDANGANG

"Temoatsü aser timtem khuretji tabeneri dang metet."